

25. april 2002

UPA 2002/23

Folkehjuskolit pillugit Inatsisartut peqqussutissaattut siunnersuut

pillugu

Inatsisartut Kultureqarnermut Ilinniartitaanermullu Ataatsimiititaliaata

ISUMALIUTISSIISSUTAA

Aappaasaaneerinermi saqqummiunneqartoq

Inatsisartut Kultureqarnermut Ilinniartitaanermullu Ataatsimiititaliaat suliarinninnermini ukuninnga inuttaqarpoq:

Inatsisartuni ilaasortaq Naimanngitsoq Petersen, Atassut, siulittaasoq
Inatsisartuni ilaasortaq Ruth Heilmann, Siumut, siulittaasup tullia
Inatsisartuni ilaasortaq Lars Karl Jensen, Siumut
Inatsisartuni ilaasortaq Olga Poulsen, Inuit Ataqatigiit
Inatsisartuni ilaasortaq Mogens Kleist, Kattusseqatigiit

Inatsisartut Kultureqarnermut Ilinniartitaanermullu Ataatsimiititaliaata UPA 2002-mi siuller-meerinerup kingorna siunnersuut nassuiaatitai ilanngullugit misissuataarppaa.

Siullermik ataatsimiititaliap isumaqatigiittup Folkehjuskolit pillugit Inatsisartut peqqussutaata 1980-imeersup nutarterneqarnera pitsaalluinnartutut isigaa.

Nunatsinni hujskoliusut marluk ukiuni amerlaqisuni nunatsinni inuiaqatigiinnut ilinniartitaanerup kulturillu tungaasigut annertuumik tunniussaqaarsimapput. Ilinniartitaanermi pissutsit ukiuni qaangiuttuni allannguuteqaarsimapput, taamaattumillu inuiaqatigiinnut pingaaruteqarpoq hujskolit aamma malinnaatinneqarnissaat.

Siunnersuut naapertorlugu ilinniarnersiuteqartitsinermit malittarisassat hujskolini ilinniartut hujskolimiinnermik nalaani ilinniarnersiuteqaarsinnaasunngorlugit allanngortinneqarput. Taamaalilluni ataatsimiititaliamit iluarisimaarneqarpoq peqqussutissatut siunnersuutip kingunerissammagu inuusuttut amerlanerusut

hujskoleriarnissaminnut periarfissaqalernerat, tassami kommunit ataasiakkaat aningasaqarniarnermikkut pisinnaasaat apeqqutaajunnaartussaammata.

Ataatsimiititaliattaq nuannaarutigalugu paasivaa hujskolini marluusuni timersornermut tunngasunik, nipilersornermik ilinniartitsineramik kiisalu eqqumiitsuliornermik ilinniartitsineramik ingerlatsisoqarsinnaanissaa oqaluuserineqarsimasoq. Tamatuma saniatigut inuusuttut ilinniagaqarniartut ilinnialernissamut piukkunnarsarlu tik nukittorsarneqarnissaannut hujskolit atorineqarsinnaanerat eqqarsaatersuutigineqarsimavoq. Iliuserineqarsinnaasutut periarfissat tamakku tamarmik peqqussutissatut siunnersuummi eqqarsaatigineqarsimanerat ataatsimiititaliap iluarinartuutippaa.

Tamanna tunngavigalugu ataatsimiititaliap isumaqatigiittup inassutigaa Naalakkersuisut siunnersuutaat Inatsisartunit taperserineqassasoq.

Taama oqaaseqarluni Inatsisartut Kultureqarnermut Ilinniartitaanermullu Ataatsimiititaliaata siunnersuut aappassaaniigassanngortippaa.

Naimanngitsoq Petersen,
Atassut, Siulittaasoq

Ruth Heilmann, Siumut,
Siulittaasup tullia

Lars Karl Jensen, Siumut

Olga Poulsen, Inuit
Ataqatigiit

Mogens Kleist,
Kattusseqatigiit